

肖巖詩鈔

肖巖詩鈔卷三

涇上趙良霽肅徵甫著

琴溪

奔流捲地來峭壁橫空起狂淵一以障漚作寒潭
紫長虹通窈窕幽洞臨清泚緬懷琴高生出入烟
波裏啓龕讀素書鍊石注精髓至今春澗魚猶是
藥爐滓溪有小魚云是琴高鍊丹時藥渣所化暖浪泛桃花輕舟遊
上巳矯首望層雲如逢跨赤鯉

龍山書屋

覩得林泉關小齋不教勝地久沉埋十年種樹初

成蔭三徑招朋與寫懷小酌春花飛盡檻微吟夜
月上苔階買山愧我囊無物借住名園亦復佳

碧雞

曉日初上花枝明碧雞飛向窓前鳴晚烟欲暗前
山麓碧雞來傍梁間宿階除飲啄適其情逼之不
懼撫不驚我昔嘗讀文穆詩數年夢想今見之居
然鸞鷟快先覩豈與夏翟爭羽儀或云和致祥垂
致異赤鳥白鵲俱成瑞禽鳥往往先得氣當年文
穆真賢相暫向台泉開講帳河汾弟子盡英豪鳥
也飛鳴宛相向我今久蹭蹬毛羽都摧頽從遊二

三子誰是圖南材
人間將相不到此
應與斥鷃棲蒿萊
嗟爾碧雞之瑞胡爲來

桂花

西園雙樹著花遲
直到風清露冷時
靜夜香參開士偈
空堂臥誦小山辭
招來皓月成三友
渺爾文心擬一枝
莫待秋光零落後
荷衣蘭佩共相思

遊巖龍寺

奇巖倒垂如飛檐
豁開其腹虛而含
以石爲屏木爲簾
不勞人力開禪龕
其後竅穴通寒潭
龍蛇罔兩同此潛
我欲把炬縱幽探
洞口逼仄行未堪
山

僧導我趨茅菴汲泉爲煮春茶纖清風習習足力
添愈復導我登山尖下視巖壑萬木參烟雲迴合
蒸成嵐我生于世無所耽每逢勝地輒久淹亦知
造物怪不廉奈何此心無屬厭同行促歸多憎嫌
不覺巖隙生新蟾

題張氏箋石山房卽示張子

張子從我遊醇謹不敢肆作文如其人所少惟盛
氣我欲矯其弊卽境爲罕譬不見箋石居卓立形
勝地其下臨大溪闊遠與天際我來值仲冬水涸
溪可厲非不愛澄清了無波瀾意萬物反其原如

人老將至追思春夏交新漲急東逝涇流迷渚崖
浮物無鉅細雖非向若嗟已有放海勢如文得壯
觀迥異幘下駟韓蘇昔論文養氣實有事氣盛言
則宜非可強而致行當與子別恐子明自棄子歸
卧山房舊業及時肄山中多竹石適我皆新異竹
虛貌有筠石堅齒可礪豈獨俯溪流會心能遠寄

贈曹懷吾

懷吾與余爲童穉交年四十餘始生子以
詩索和余方遠遊未報也近館龍山書屋
與懷吾相去咫尺朝夕過從乃作詩以贈

之

憶昔與君初定交君甫弱冠吾垂髫二十餘年一
彈指意氣無復元龍豪我爲飢驅浪奔走攬鏡早
覺形容焦豈如君能解外膠心有至樂留春韶前
年一索得男子鳳雛早識無凡毛作詩獨痛乃翁
逝孫枝乍茁桐先凋差喜年來學語嬌慈闈用此
娛昏朝讀君之詩繹詩意太息生我誠勗勞竭來
借榻龍山麓過從不待書來招如遊逆旅逢叔度
令人鄙吝心全消白塔寺前踏秋葉琴高溪上觀
春濤屢與點也樂風俗何妨顏氏操簞瓢丈夫得

志立廟朝不則混跡隨漁樵安能俯仰如桔槔我
今請與君久要他年卜地同結茅我耕子鑿心囂
囂兩家子弟互提挈敎讀語孟兼詩騷

寄呈台泉書院司事諸公

山靈自昔護三台重見菁莪樂育材欲爲相公延

化雨應勞別駕斬荒萊

許文穆設帳時王別駕汝涵極地主之情杪櫛

古樹當年澤石扇雲迷此日開頗喜書堂成唾手

莫敎風雨遽摧頽

鋤烟鑿石剪茅茨新闢樓臺異昔時永與台泉留

勝概須從鹿洞仿遺規令君已報文翁績

江蘇陸明府牒

詳上 憲 多士遙瞻董子帷應爲學田謀二頃談經百
代得名師

北遊

失鹿夢自疑見獵喜猶在誰其驅我遊屢困心不
改上策已三黜僂指經十載若使杜門居讀書功
百倍難爲往者咎一任後來悔搶榆陋卑飛守株
笑空待况當賢路開時見芻蕘采突兀黃金臺庶
幾始郭隗

過巢縣

征帆如鳥指南巢欲買輕車住短橈閭左至今悲

亞父洞天何處訪王喬幾家白屋回寒照一髮青山捲暮潮長路輓塵從此去不堪雪霰夜蕭蕭

手車行

小車無衡軛駕人不駕馬與牛中有一輪夾兩榦以手御榦輪如流上可容兩人坐臥安無憂摩肩復交臂有如兩木偃蹇枝相樛坐與俱坐起俱起所苦牽掣難自由居巢郭外湖潏澗湖上怪山石龍嵒我車碌碌行其間石勢向人欲飛動左欹右側路盤迴下循澗谷上岡隴車輪蹙縮行曳踵危如垂堂心惴恐是時殘臘日易仄朔風吹空向昏

黑吹落雪花大如席我車泥濘不得前我僕慘澹
無人色僕夫爾莫哀我前爲挽爾後推荒村野店
畱信宿解囊與爾沽新醅一飲滿腹不計杯回寒
作暖如挾纈明日雪晴行色壯

過合肥

酒旗茅店兩三家金斗城南暫駐車天外好山浮
海上林端落日向人斜遠遊已慣知風土殘臘無
多感歲華過客匆匆懷孝肅祠堂回首暮雲遮

壽州道中

斜日寒雲放晚晴雲邊矯首見山城天開平遠宜

遊眺地。三淮幾戰。寧。楚相八公草
木走秦兵。興亡轉瞬。俱塵劫。獨有津亭。自送迎。

壽州懷古二首

衛公未肯比。微之三俊。齊名彼一時。千古壽春思。
短李空亭。畱得大蘇詩。右李紳

小朝君相表。稱臣忍見周。師入壽春。馮道李琪誰
不死。紛紛五代有三人。右劉仁瞻

芍陂

中流斜日色。遠岸晚山痕。十里芍陂好。千秋循吏
存。功能周水旱。澤不到兒孫。優孟真堪託。終酬故

相思

旅店阻雪

旅愁久漸堪車輪不遑息朔風捲地來飛雪暗山
驛澤行苦泥濘山行困登陟茅店依古樹晚烟出
檐隙主人喜延客信宿屆除夕筵開餞歲樽盤簇
異鄉食勸酬互舉杯加餐自努力明日故園春獨
行大江北

過潁上

繫纜臨清潁荒城壓水濱野雲垂作雪沙柳暗攙
春誰挾甘羅策長嗟管仲貧客途知已少懷古獨

傷神

阻冰

飛蓬捲沙風夜鳴力迴春水成寒冰扶桑朝暎照
未澈重陰入骨堅且疑詩人小心戒履薄視此厚
載無戰兢小狐汔濟不濡尾螯魚欲起還潛形船
頭饑鳥啄殘雪羣飛點綴玻璃屏繫纜河干三日
住欲退不可進不能有時遣悶策筇杖踏遍雪岸
兼烟汀歸來擁絮成噤痒薄酒無力愁易醒安得
皇天反春煥解釋澤腹流有聲清風習習一葉輕
卧看兩岸垂柳青舟子浩歌報水程屈指計日遊

梁城

朱仙鎮拜岳廟

大將在軍不受命史論紛紛吾欲更中原引嶺岳
家軍岳家一稟朝廷令用少擊多固有神忠義誓
師能制勝若使鐵騎逞長驅未必人心爭響應王
家社稷得自專將軍號令誰能聽所惜時機不再
來十年血戰功未竟金牌屢詔促班師樞密拜官
解兵柄南趨吳越闢半隅北望燕雲失二聖嗚呼
少保且不免何物書生見先定四字精忠死亦安
千秋慕義氣空橫翻疑當日未行權豈識英雄終

守正君不見魏公誤殺曲將軍將軍跋扈終爲病
豈若少保無遺行不讓唐家郭與晟我來古鎮愁
雲飛想見兩河血淚迸祠前下馬薦溪毛向南檜
柏風霜勁

汴梁懷古

平臺東苑總荒涼勝國分藩古大梁對酒歌猶誇
樂府傳經跡已泯書堂祇知信誓河如帶誰解洪
流患預防萬戶蒼生魚鼈憾論兵何意有高黃

夷門弔信陵君

天下無雙是信陵寒烟落日大梁城監門有吏從

屠隱執轡何人虛左迎毛薛一遊傾趙客殺函十
載抑秦兵魏王底事成猜忌長夜沈酣了此生

登汴梁城樓弔宗留守

高城百尺俯春陰尙憶雲屯鐵騎侵航海不回天
子蹕渡河終見老臣心英雄一死分南北殘壘連
珠自古今五丈原頭同此憾出師未捷淚沾襟

經宋故宮

宋家宮殿莽荆榛萬歲山頭一劫塵北去牛車燕
地雪南來花石汴京春高情不合爲天子邊釁無
端啓寺臣莫羨晚霞金世界幽蘭堂畔倍愁人

禹王臺

卽師曠吹臺

曠不見山色高臨神禹臺蒼然平野盡忽放大河
來古壁風雲壯中宵鼓吹哀欲尋三晉客駐馬久
徘徊

上方寺鐵塔

攬勝時孤往聞鐘到上方浮屠無歲月古色最青
蒼積氣通諸界長風接大荒振衣凌絕頂高處易
斜陽

胡采若席上醉歌

平生好友如搏沙失手一放成天涯五年之別今

夕聚令我喜極翻咨嗟憶昔都門一杯酒君爲彈
絲我擊缶欲從燕趙訪奇士不惜姓名混屠狗燕
山笑兀黃金高少年意氣誠疎豪豈意容顏成老
醜十年奔走風塵勞喜君一官古梁苑恰值飢驅
策跋蹇官舍張燈夜開摺燈前細雪飛花片高李
論交剩酒墟鄒枚作賦空詞院酒酣耳熱一懷古
不覺悲歌激清汁君不見謝公哀樂中年多兩曜
催促如飛梭客中樂事難再得明朝揮手臨黃河

過淇縣作

讀雅警德隅吟風懷淇澳有斐歌武公宅心承康

叔驅車遵廣塗覽古弔遺躅流水徙泉源荒榛失
綠竹迹泯痛澤斬道存喜私淑善譔成文章禮防
守金玉翳余寡世營夙好貞幽獨壯遊歷風塵微
尙外榮辱時恐老耄侵意負友朋勗夙知無暮成
斯言可三復

過湯陰拜岳廟

白骨冬青事可傷風雲尙護此祠堂兩宮獨灑孤
臣泣三字先飛六月霜沛國歌猶思猛士監軍晏
亦想汾陽不知高廟誠何意忍壞堅城萬里長

過邯鄲作

槃散行汲黯豎子臨流一笑美人死翩翩公子平
原君結客高義凌青雲所嫌相士無特識多者千
人寡者百毛生不作囊中錐相如翻爲宦者客長
平坑後邯鄲圍乞援請盟冠蓋馳不是信陵急姻
亞應爲臣妾從西歸乃知好士曾何補紛紛戰國
徒豪舉博徒買漿豈能賢天下無人知仲連

呂仙祠

疾風甚雨作春寒欲借仙祠暫解鞍一枕黃梁誰
早覺紛紛車馬上長安

不負盧生睡這場古今轉眼卽滄桑蓬萊果有神

仙在差比人間午夢長

樂城早發

夢與江南別身從薊北行
晉人懷武子小邑號樂
城市暗風塵色人多燕趙聲
道旁新柳好牽動故鄉情

樓桑先主廟

龍種生前迥不羣中原無路假風雲
半隅但闢青衣地正統終符赤伏文
古驛金牛飛杜宇荒祠琢鹿對斜曛
欲尋故里童童盡空歎英雄獨使君

張桓侯廟

躍馬橫戈有壯猷，追踪召虎見桓侯。
據來長坂頻瞋目，收得將軍是斷頭。
亂世英雄誰擇主，故鄉魂魄尚依劉。
千秋獨歎關張命，計失吞吳憾未休。

京邸與翟蘭陔朱甘仁夜飲

一技逢時不易工，遠遊聊與故人同。
未能免俗還相笑，但有盈樽莫放空。
世味爭多蝸角裏，春光強半馬蹄中。
開懷忘却身爲客，醉倒筵前月半弓。

哭翟組文

生別還成死別憂，百年身世似浮漚。
屋梁落月人千里，野草悲風貉一邱。
腹痛每思平日戲，魂歸真

悔異鄉遊欲將靈櫬依先兆高義誰能贈麥舟

旅食

旅食京華懶叩門衣衫憔悴半塵痕交新燕市屠
沽客夢繞江南穰穰村偕計徒思竊升斗遠遊多
愧廢晨昏看雲步月鄉心切欲慰羈愁酒一尊

移寓五聖寺

冷煖人情我已諳幽棲只合寄茅庵不須長者留
車轍且與高僧掃佛龕地闢清涼非世界軒臨竹
石憶江南宋生坦率尋常事捉鼻抄書苦亦甘

中秋看月用坡公韻

一輪飛出蒼天高山河大地如秋毫纖雲四捲列
星沒清風吹散銀河濤誰遣天涯照遊子虛堂紙
帳涼如水寒燈斂焰不成眠中夜思鄉還獨起起
看金波似轉丸誰言桂樹當中蟠若使清虛真有
府應比下界尤淒寒我昨南來道梁汴月光盈缺
幾回變時同客店聽雞聲每向離筵照歌拚相隨
萬水與千山較視貧交志更堅登堂不教重戶隔
照影常作三人看百年幾見今宵好看月銜杯莫
草草祇恐寒霜上青鬢一回看月一回老人生嫌
老不嫌貧歸去山中多故人時憑絃管吹月出不

作思家步月客

九日陶然亭登高

鳳城佳節又重陽與客攀藤到上方天爲遊人收
宿雨樹畱殘葉傲嚴霜秋陰匝地通遼海山勢浮
空矗太行極目故園何處是此心遙逐雁南翔
眺盡烟雲鬱九關危亭千尺聳孱顏吟瓢蹇衛疎
林外戍鼓明駝夕照開客夢不離江上樹秋寒先
到薊門山一樽且自陶然醉郭隗荒臺未可攀
對酒當歌且盡歡天空萬象入檐端平原草短輕
車過古木風高一鶚盤西眺浮圖橫石景東來河

勢折柴乾却嫌叢蔣菜莢好併入離憂不忍看

與汪自占胡康仲移寓三藐巷

平生淡漠性於世若冰炭一二同心人落落晨星
散翻因作客地始得同昏旦小別輒經年見面共
三歎汪子冰玉心兼能盛文翰胡子坦蕩人畧不
設崖岸二子誠有道和介若相判要其擇交時可
否皆立斷憶昔從家君二子如血汗紫陽書院名固
多賢心賞獨爲冠時時過我居見我一笑粲把臂
爲忘年撫心切嚴憚竭來京洛遊廿載星霜換旅
食苦風塵借榻棲禪觀茅菴遠城市虛室容几案

古道相與期奇文互披玩圍爐共劇談聞鐘過夜
半我知二子心非欲矜汗漫奈何世上人聞言獨
河漢

冰船

一夕風吹澤腹堅 御河無數踏冰船但教涉險
能爭捷便有人拋趲渡錢

上大司空周燮堂二十韻

德望中臺貴官堦起部崇納言司北斗故事著南
宮六職資興作諸曹感忻懽衆能恭爾事 帝喜
若予工歟起由西浙持衡屬我翁門生收國士座

主免冬烘已料堂爲玉何期印佩銅一官居甸服
三異達宸聰漸歷屏藩重還專節制雄入朝承
湛露開府布仁風暫蹶垂雲翅常傾向日衷推

恩留副使紀績擢司空任大心彌謹居高氣益沖
開軒延衆論把酒忘三公黍谷春光滿金臺古誼
隆造門披宿霧作客感秋蓬米羨侏儒飽途嗟阮
籍窮誰悲櫪下驥獨惜繫餘桐志切天池外名慙
藥籠中欲爲知己報長劍倚崆峒

豐臺看芍藥

獨攜尊酒過豐臺婪尾花宜婪尾杯見慣朱門金

作帶轉憐綠野錦成堆春從送去留還住客是將
離得暫來十里紅塵吹不散日高風謔一時開

晚遊金魚池

落日倒射軒窗明微風遠來吹酒醒披襟岸幘無
一事策杖自向城南行城南地僻芳草綠池塘水
滿金魚伏遊人欲令魚出遊故拋餅餌投飢腹佇
看潏潏生微波芳香招得紅鱗多羣遊池面舞荇
帶一擲空中飛水梭前者得食快先竄後者馳逐
爭相摩不嫌攘奪損鱗鬣儼如風雨翻江河跳青
裂碧千頭集鼉舞鯨吞有時立未遇臨淵密網投

焉知入肆枯魚泣萬物有情皆有求紛爭一飽生
煩憂孰與豪梁伴莊惠垂楊蔭下從容遊

舟中與吳啓南作

清簟虛窓穩晝眠同舟有侶異登仙歸心落日山
城外客路輕風水驛前久薄微宮嫌鼠嚇獨持編
性怕人憐林泉隨處容茅屋十載塵途悔執鞭

臨清弔謝茂秦

好俠能詩謝四溟布衣禮數抗王庭生前眇目輕
餘子死後芳名動改亭自愧風塵終骯髒誰將聲
伎慰飄零一杯欲共仙人把千里漳南墓草青

東昌弔鐵尙書

肯放燕師過濟南
鐵公智勇信奇男
懸牌直下三軍淚
殺敵終麾一戰酣
自古帝王身不死
可憐臣子肉猶甘
行人繫纜聊城外
故壘風雲尙可探

南旺龍王廟

古廟高臨汶水濱
南通吳楚北燕雲
何人到此無離憾
淚落烟波兩地分

登太白酒樓

賀監乃知青蓮才
一樽邀得騎鯨來
樓頭對酌山雲開
雲中秀色浮徂徠
至今遺像留城隈
長庚夜

落樓崔嵬我來登眺獨徘徊想見豪情溢九垓欲
爲仙人勸一杯螟蛉蜾蠃吁可哀

杜工部祠

倦爲京洛客來拜少陵祠天子蒙塵日微臣每飯
時青雲三禮賦白首八哀詩秋水任城外流風獨
繫思

憂國寄遺容頽然一秃翁從來比稷契未免逐狙
公客濺啼鵲淚途悲老馬窮謫仙樓正近應與話
幽衷

過揚州

三過維揚不繫舟誰攜樽酒慰窮愁竹西歌吹多情甚直送輕帆到石頭

贈張芷汀

時欲歸祝母壽

燕公大手筆豈是幕中賓應爲太邱長相招涇水濱傾心爰下榻歸計欲娛親獻歲拜家慶稱觴猶及春

除夕偕弟雲起姪師臣繩伯遊水西

昨朝拂面春風起鴨頭已綠西溪水探勝何妨逼歲除好山招我入山裏去年此夕客殊方旅伴歡呼傾一觴醉中忽覺語音異外雖強笑中含創遠

遊不如歸故鄉歸來事事拂人意一錢羞澁留空
囊啼號滿室恹不樂時作牛吼鳴飢腸翻念作客
雖踴蹙免對妻孥增愧惶門前剝啄來何突少年
奇氣森鬱勃脫畧俗情無罣牽痛惜流光去飄忽
東隣西舍饋歲忙掉臂尋春呼我出江梅岸柳各
懷新青入纖眉香徹骨泛舟亂烟水扶杖穿叢篁
青蓮詩閣黃蘗場偷閒一日終徜徉鬱鬱遠山入
空碧荒荒古樹臨斜陽倦來便可棲禪床能令內
熱生清涼試向山前望城市人聲沸地如蜩螳

紅梅

疎簾乍捲遇傾城一種新妝帶宿醒斜日樓臺微
掩抑凍雲籬落倍分明繁華隊裏高寒韻鐵石腸
中冶艷情輸與東坡老居士能將梅格入詩評

贈邵東田

東田名士鈴蕪湖人工山水
弟雲起及姪繩伯俱從之遊

我生好畫兼好遊遊山讀畫消煩憂有時却掃垂
簾鉤巖阿入夢通深幽東田能詩逸者流胷中邱
壑羅九州耕烟注墨一揮洒腕力所至吞全牛宣
州有佳紙柔白勝蔡侯裁爲四幅成一卷縱以尺
計橫可三丈周先生爲仿大癡意凝神注視恣冥
搜磊落幾筆作枯樹巉巖百丈飛靈湫林巒幽邃

補茅屋江天平遠來漁舟一水一石疊成千里勢
巧奪造化真宰愁先生善畫固天授昆季戚友皆
康繇南宗北派明辨哲書林藝苑窮追求與我論
畫皆有本不似閎大談天鄒畫求性靈畧形似此
語默契蘇與歐吾年四十早衰不可用抱疴久臥
何時瘳下筆已難追董巨入山惟欲從巢由吾家
二子頗有道臭味自與先生投朝夕過從不阻風
與雨槎枒竹石一變成林邱二子舊工竹石今皆能山水矣阿弟
心細繭絲抽蕭疎秀韻凌清秋阿姪膽大風電落
淋漓元氣爛不收我力不能爭絀優任放二子出

一頭但欲倩作五岳與十洲挂我縹緲百尺之高
樓令我長年坐卧于其下便與尙平禽夏如面謀
他日先生訪涇水應許後輩追前修

偶作

待月空階把一杯頽然醉後卧莓苔閒情忽被黃
花惱盼過重陽不肯開

贈雪帆上人

道人水鏡句澄清幕麓

謂寰宗

賢山

謂天水

得代興已

了真源通佛祖直將餘事作詩僧燒殘藥竈霜零
葉立盡寒溪月挂藤悟得天花衣不染皎然何異

嶺南能

雁字次韻

銀霄真作衍波箋付與賓鴻八體傳鳥跡辨來頻
畫肚霜花落處欲盈顛臨池影動秋先到繫帛書
成夜不眠正是懷人牽遠望一行飛過碧雲天
整整斜斜笑未工如人如一意兼通始知雲篆諸
天界不在羲書六紙中尺素經時傳紫塞夕陽流
影上雕櫳鶴頭虎爪形多變極目秋空約畧同
蕭疎木葉下衡湘苦厭家雞愛雁王勢作折波啼
月斷羣成連錦御風長顏公新意秋膺骨張老通

神古劍光若遇書家觀物妙清江涵影筆鋒藏
掃落長空一片雲何如白練戲羊欣痕留積雪三
生幻畫啓先天萬物文洲渚烟霏迷未定邊沙風
勁聚還分十年古塔無題字結體聯翩羨爾羣

過藍山

不到大藍寺離憂逾十年遊人增老病山色舊嬋
娟畫嶺沒斜日星潭流遠天登臨懷太白長嘯落
寒烟

和繩伯詠古跡寄盛春谷五首

爆竹燒松逼歲除苦吟未免笑迂疎癡如阿叔吾

能賣艷摘騷人爾不虛得句一年酬酒脯閉門終

日註蟲魚莫嫌長者車頻過

謂春谷

已有名傳楊子

廬

茅廬占斷水西濱何用王喬侍玉宸座有客來容

一醉心當齋後絕三暝竹林遊好偕南阮步障豪

華笑季倫獨有清詩常弔古溪山招得幾才人

五詩

皆詠邑中流寓

蒼茫抱郭萬山斜不遣寒雲望眼遮誰愛伴狂招

李杜已拚鋼疾付烟霞丹崖古洞仙人窟錦石澄

潭帝子家踏遍涇溪溪上路先春應得發心花

轉眼韶華大塊新桃花深處不知秦茶爐水沸風

林外棋局聲敲石澗濱地關千秋留勝跡詩成七

字到前人重逢太古錢郎後

盛太古明詩人牧齋採其佳句以爲錢郎

復生無以過此

二月烟波好問津

太古有烟波二月已愁人之句

獨把文章謁講幃知音相遇動琴徽

春谷爲台泉書院山長繩

伯以詩謁之遂與訂交時同唱和

交成蘭臭甘寧淡吟到梅花瘦

勝肥雪夜懷人時命駕天涯作客不言歸他年邑

乘搜流寓記取攜樽坐翠微

短歌行

除夕作

對景揮戈老矣蹉跎罔極未報傷如之何兒疾親

疾兒疴親疴而今而後誰爲撫摩柏酒椒盤陳布
几筵物存人歿搶地呼天自我昆弟五人一體天
奪其三同生異死死有知念我孤兒苦塊相對
夢寐猶疑上帝之仁萬物同春嗚呼天地間乃有
鮮民

東山菴

開春苦零雨園卉埋寒陰及此新霽色頗能愜幽
尋言泛西水掉遂陟東山岑攀途屢登頓展昧窮
高深精廬架巖隙齋鐘流遠林象教鎮言說異香
清道心幸能謝物役兼得通梵音空堂夕烟暝前

峯初月臨微燈淡疎幌嵐氣棲寒衾夢回聞幽澗
猶疑風雨侵

上孤嶺遇雨

亂山中闕一幽蹊雨後危途不可躋盼到長亭纔
小憇滿林雲暗竹雞啼

東山菴早起看雲

鐘魚破夢春山曉起步崇巒凌木杪上山下山同
一雲化工幻作滄波渺我聞黃山雲海天下奇一
縷卷舒彌八表三十六峯出沒于其中有如蓬萊
閣下浮烟島平生夢想湖海寬遊踪獨困均堂小

豈意壺中有大千能令卽境開懷抱山頭老樹如
枯槎勢與奔雲赴蒼昊我欲乘此窺河源乾端坤
倪恣幽討東觀若木飛朝暉陽烏光射洪濤奔好
風疾掃天無痕堆螺擁翠出邱壑垂楊紅杏開山
村世事由來如掣電白衣蒼狗須臾變卽看山川
倏改觀豈有耳目容迷戀嗚呼山靈有意破我心
迷戀

晚歸

冉冉日墮林翩翩雀翻樹暝色促歸心樵逕失安
步望斷後山剎聽喚前溪渡危石走新湍短掉困

沿沂中流蕩空明衆星燦羅布寧蘇行
夕怡與清境遇隔岸見寒燈孤城辨歸路

偕堪輿朱廷魁早行

遠道凌晨去牛眠何處尋柳梢殘月落驢背萬山
深華屋古來歎墓田人子心楊曾不並世蒿里足
悲吟

宿承流峯下茅庵

承流峯高天尺五環山百里皆可覩我從雲消日
朗時屢邀清光到蓬戶幾年望見今一遊力倦未
得窮深幽但見絕壁青蒼立積鐵嵌空細路猿獮

肖巖詩鈔卷四

涇上趙良肅徵甫著

道上望青山

磴道盤紆積翠間
塵途矯首阻躋攀
十年剡嶺催雙鬢
萬古長青此一山
陰壑烟霞隨候鶴
待人還向來寄宿
招提境清磬斜陽靜閉關

聖泉亭

亂山湧清泉奔流赴巨壑
一漚成澄潭倒影浴雲
崿地險關危亭土斷橫
畧約我行困驕陽遇此欣
有託煮茗散塵襟坐石憩
芒屨水聲何激激清風

起林薄

巖關

崎嶇一徑蟠突兀兩山峙疊石作巖關意欲限方
軌陽城及中南天險尚難恃況此三百戶小邑如
黑子莽蒼荆榛叢下有忠義鬼每當風雨秋冤哭
聲夜起緬懷勝國時於此築軍壘臂怒奮螳螂穴
鬪屯蜂蟻明知不可爲要在得其死王師浩蕩
來力不費弓矢山川險旣夷鳥雀聲自喜我生值
太平弔古乘彼塤荒烟落日中漠漠衆峯紫茲事
已百年諸人附明史如周有頑民刪書載多士乃

知寬大朝用以厲廉耻

雲起寄讀長春菴因留宿二日

老去難堪離索愁弟兄相遇且淹留一春入夢酬
靈運四海知心有子由得句斜陽芳草外聯床夜
雨亂峯頭明朝又向山前別懶看風花獨倚樓

次韻盛春谷訪繩伯山中讀書處

旅遇師表黃人逢有道郭名山開講席羣才歸檢
約青眼及仲容道交契恬漠方春感索居矯首望
雲嶠聚如風約萍散如泉泛籜離憂積歲時命駕
歷巖壑嗟余久臥疴積雨阻遊脚誰陪鳥道險與

捫葛藤弱溪山供詩料風景頗不惡歸來探錦囊
得句珠錯落陽春屬和難諸子才力薄謂舍姪師臣惠南
有如埴井鼃仰視北海若何況老禿翁束書久高
閣新詩三過讀橋舌屢驚愕枯腸死欲搜天漿苦
難酌惟當從阿咸入山刷靈藥

卽事

借得禪房靜臥疴花開花落任蹉跎遺書不讀貪
新購好友難忘喜偶過水面魚吹梅雨細隴頭雉
雉麥秋多晚來立杖柴門外一逕蒼烟鎖綠蘿

松棚次韻

貢石松風屬子虛松陰滿架意何如揮來麈尾憑
驅暑截得龍鱗愧著書屋角缺逢蕉葉展樓頭密
與岫雲舒此間便可容清夢夢見羲皇到敝廬
炎威飛不到芳庭閉戶曾無襜褕形一任中天臨
火繖獨招秋影上書檣雨風時覺江濤轉心跡閒
如野鶴停比似豆棚花下坐農家未及此深青

雨

翻翻蒲葦聲初亂漠漠林巒望不開一水連雲三
寺失八窗飛雨萬山來偶蘇病骨涼生席閒掃餘
花錦作堆老去詩情渾減却空勞頭上故相催

肖巖詩鈔

卷四

三

晚至南郊古寺

山氣欲成雨，宿迷簷外青。
晚風收溽暑，高樹見疎星。
人語辨蘿逕，火明知佛扃。
吾生從野老，耒耜訂遺經。

諸子賦苦雨詩用其韻

爾輩吟成苦雨篇，牽將老眼盼雲天。
應須石煉靈媯補，直恐檐流后土穿。
聖主養恬勤問俗，腐儒粗糲望逢年。
徐揚一帶江湖溢，螺蟹頻來占稻田。

廷瑞招集南山石佛寺

合沓蒼烟嶺樹齊，向來借榻此巖栖。
故人避暑依

脩竹尊酒招朋關小蹊落日荒林松鼠竄先秋老
屋草蟲啼蝸廬咫尺南山近還往休辭月在溪

清渠閣

飛雨灑箇閣蕭然生晚涼避席步荒園解帶依疎
簟初月不在地水面生微光臨池一延佇清露沾
荷裳緬懷弱冠時昆季此聯床晚來課書罷竹邇
吟斜陽彈指廿寒暑傷心判存亡徘徊尋屐跡草
色侵池塘

南山橋

環寺遠山疊抱山溪水遙我尋溪上路極眺南山

橋人與漁樵適涼從竹柏招靜觀魚自樂多事辨
嘒嘒

石佛寺老松歌

荒原日落長風來崩崖轉石萬壑哀野花狼藉委
莓苔蒼松突立南山隈我來松下獨徘徊仰觀直
榦撐雲堆亂雲一壓高枝顛倒披四旁垂髯鬣重
陰似欲連九垓不知羲馭空中催羽衣列坐清氛
埃杳無酷暑侵霞杯其上一榦尤怪哉盤空屈鐵
如環鉤每從高處戰風雷風翻雷震力排推仙人
嘆爲不世材截取怪龍遊蓬萊飛騰變化不復回

猶遺朽骨白皚皚我聞泰山頂有秦始臺參天一
樹蟠崔嵬壽安慈仁幾劫灰金元故物誰滋倍多
借後人詩賦才傳與萬古爭瑋瑰石佛寺本唐時
開脂香珀化千年栽先朝法物留尊罍委棄荒山
隨野梅幸無兵燹芻蕘摧長與我輩相追陪騰跳
颺颺棲鶴胎名雖不耀身不災且從社櫟恣嘲詼
何必魯詩歌徂徠

喜繩伯歸自山中卽送赴省試

古人別三日相見豁雙瞳況茲三月別豈復吳下
蒙自爾負笈入山去令我離索心忡忡有時矯首

望雲月雲邊月下千萬峯不知何峯是爾讀書處

但見芭蕉鳥鵲

二嶺名

一一拔地撐青穹今夕復何

夕款門一笑欣相逢經笥武庫不可測袖裏文字

光熊熊詞源倒流筆橫掃應無阿私所好杜陵翁

已知欬唾落珠霧佇看健翮排雲風 國家取士

期必得入彀豈欲愚羣雄孔孟程朱道大顯設科

不與漢策唐賦同俗儒揣摩有司之繩尺僞體亦

足欺冬烘魚目蚌珠縱難辨畢竟好惡自在人心

中我輩行藏愼始進不以苟得貪天功 朝廷制

作須雅頌應棄瓦缶求洪鐘天生爾才必有用豈

令啾啾唧唧苦吟如寒蛩六月暑風急江上火雲
紅送爾白門去戰藝張軍戎鯨魚鼓蕩滄溟闊驂
騶蹴踏凡馬空得意歸來過山寺笑看題詩壁上
紗爲籠

養魚

萬物各懷生得地自長往荒園關小池羣魚資惠
養避客就深潛爭食躍波上日高楊柳陰夜靜菰
蒲響卽此江湖心豈有風雲想長同井甕居永供
野人賞末俗恣貪饕鯢鰕收密網人窮物命微目
擊我心快孰似此魚樂濠梁同浩蕩時減杜陵餐

不受校人迂

秋日謠

夏之日雨淫淫重陰壓天天欲沉秋之日日炎炎
酷暑中人人如惓淫淫者絕炎炎者烈赤雲燒空
風驅不泄陸地塵飛良田龜裂塵飛增我疴龜裂
枯我禾抱疴尚自可無禾饑殺我

螢

芳草是前生緣堦復拂楹飛空原不碍在闇益能
明破屋殘星落遙山片月橫紗囊誰貯爾伴讀到
深更

喜雨

一雨飛來久旱天回青潤綠定逢年山妻不解余
心事笑問君家負郭田

種菊一稜枝葉茂密忽失大者數株

昨夜偷將艷質分荒園抱甕枉辛勤但能愛菊誠
如我豈惜持花特贈君金谷何曾珠比價柴門辜
負酒方醺從今便織笆籬護留到重陽伴夕曛

悲亡友詩五首

梅式堂先生諱鈐字二如宛陵總憲文穆
公仲子也徙家金陵年十九舉副貢工制

藝能詩尤長于楷法文穆爲先君子師余
於先生嘗叔事之而謙沖下交引余爲友
每應試南闈輒從之遊聆其言論觀其行
身接物乃知先生學有本末近今人罕見
有卓然自立如此者而享年不永可哀也
旣歿蕪湖邵士鈴爲先生令嗣作高山仰
止圖噫豈惟令嗣宜仰止哉

翩翩佳公子學與古爲徒抗志希伊顏忍饑讀詩
書往者文穆公直聲天下無立朝有正色傳家無
斗儲士貧亦何病其中樂自如我昔遊白下得造

鄭公廬書囊不可測曠若干頃湖竊幸得師表鄙
客爲之祛高文螭班馬妙筆追褚虞遠邇慕名字
小道乃其餘別來已十載仰止留遺圖斯人不可
作吾道日榛蕪

翟君諱肅字彥雍郡廩生邑之水東人性
耿直常面摘人過人多畏而避之余待先
君子掌教寶峯書院與同硯席者五載但
見其可喜未見其可畏也君年五十無子
卒之夕繼室某氏自縊死嗚呼可以知君
之道行于妻子矣

世情吁可怪責人而恕躬不知躬齷齪翻謂人褊衷先生寡言笑質樸留古風嫉惡甚塗炭改過能包容衆人嚴憚之趨避常歛蹤我心覺嫵媚想見唐魏公垂老竟無子天意誠難通當其捐館時婦視含殮終從容就大義地下還相從固由巾幗烈寧非薰陶功脩齊驗宿學廉立開羣蒙所嗟直諒遠吾惡誰能攻

吳君諱大容字秦臣邑諸生茂林都人家
饒于貲好購書口吟手錄終日不輟而多
採古奧之辭以入制藝故卒困于場屋學

使者某不知其文所自出而欲置之極等
然未發也君聞之大憾得咯血疾越三年
卒嗟乎彼不知文於我何病而竟以身殉
固由君之褊性使然而世之持文衡者亦
慎矣哉

文士狗微名不惜喪身命得失豈非天無益空力
競吳子好讀書購書囊欲罄千卷積連床默誦如
禪定奇字檢新揚微言窺漢鄭偶發爲文章高步
追先正屢蒙識者賞獨爲有司迸霜蹄意驍騰鴻
翅垂蹭蹬緬懷徐華亭不識賢苦聖古道謙益光

今情怒方盛毀譽聽諸人吾道未爲病奈何賣志
沒狹隘亦天性

查子述齋諱森邑濟陽里聖源先生子也
先生創建寶峯書院延先君子主講席敬
禮有加族有匪人某素不見禮于先生銜
之乃嗾賊誣先生令弟先生念禍自己出
日夜殷憂遂得心疾赴水死時述齋年甫
十五痛不欲生益奮志讀書服闋補博士
弟子員終以哀毀之過踰年嘔血卒有遺
腹子七日而殤先生竟無後

查子英妙年於書無不讀寧求稽古榮偶試穿楊
鏃寶巖開講帷羣賢入陶育誰其稟幼慧而益矢
懋勗先君愛獨鍾大道隱相屬才與終賈期壽比
顏冉促君疾益有由夢寐亦號哭老親痛非命羣
小誇速獄舍寃廢蓼莪嘆逝賦飛鵬哀毀竟傷生
兩世祇遺腹奈何七日殤慶殃理難卜灑泣望蒼
天悲風振林谷

姪諱鎮字庭三少穎悟能文章與余雖叔
姪行實賢友生也旣長各以飢驅遠遊間
一聚首而已歲丙申借榻台泉精舍與同

晨夕者數月每爲余言學宜擇友廿年來
所交非人故業不進而名無聞自後當與
叔氏互相勵以古聖賢之學不意姪之遽
卒于是秋也先卒之夕余歸視之乃嗚咽
言疾必不起而其子不肖盡出所藏書以
付平生之交好者余得困勉錄益猶以古
學期余也嗚呼痛哉

附麻蓬自直漸滂蘭不薰君子慎結交直諒兼多
聞吾家有驥子十歲頗能文兩少稱莫逆旣壯悲
離羣台泉同借榻舊好還一敦自悔少年場把臂

多匪人發憤期學古卧疴忽經旬嗟余裹飯日
爾易簀晨鳥死鳴多哀淚落聲爲吞有子知不肖
出書付所親當湖留手錄困勉入德門束書不忍
見見之心酸辛

題趙古山山水

古山畫學趙文度能畫溪山及平楚雲深千嶂際
青天秋老長林間紅樹林開川斷駕采虹谷響崖
崩飛瀑布卽看奴子負書來知有佳人結茅處我
生褊性合幽棲夢裏遊蹤騁飛步瀟湘洞庭多霜
楓廬阜天台墮江霧仙人出入殊可招鶴背高寒

難久住人間絕境少奇緣空勞織女指征路自憐
衰老困泥滓聊把心情託毫素圖中有境落何方
便可裹糧從此去

鬪蟋蟀

半閒堂向聖湖開且放金籠鬪一回丞相自多軍
國事襄樊羽檄莫頻催
槐蟻蝸蠻角兩雄天生微物氣矜隆却教慚愧循
州貶不死軍中死廁中

懷繩伯

一棹金陵送遠遊蕭條庭院早成秋射雕身手推

君健聽雁江鄉記我愁官燭風簷時入夢楚山雲
樹怕登樓遙知文陣猶餘勇懷古情多賦石頭

得邵東田書却寄

不與荆關共卧遊此心常在赭山頭故人一札月

中雁野水三篙溪上舟

來書言由溪口入茂林

畫筆有神追

北苑

時寄畫冊

客途無興發南樓

來書以師臣緇伯應試未歸故欲來遊而

輟中

何時訪我林間寺露菊霜楓尚及秋

寄雲起

春歸鴻雁秋歸燕節序催人若流電飢驅爾我各
東西一歲會無三四見自從夏五與子別石榴花

發端陽節忽聽空階落葉聲蕉窗夜雨秋蕭瑟作
書招爾不肯歸遙瞻巧嶺寒雲飛白日看雲暮看
月得句唱和將從誰知子山中閉蓬戶菊瘦霜清
作詩苦八荒捕逐神太勞虛牝黃金擲何補況我
與子垂龍鍾飛揚意氣都磨礪焉有大力扛龍鼎
爭與年少關強弓何似束書入田野悠悠混跡漁
樵者與我相從無別離狂遊醉倒楓林下

題留侯納履圖

全身晚託赤松子納履先逢黃石公偶語挾書秦
法禁陰符夜授小橋中

哭再姪季思

鴻閣當時馬帳懸與君同侍最髫年

季思爲余業師立二先生

之儒家舊德經猶在才鬼多情命不延曉日天門

思振翮淒風江上望歸船

時應南閣秋試卒于金陵旅舍

可憐廿

載西州慟埋玉重悲隔九泉

望絕桐孫大母傷招魂誰解扣天閭坡公喜見豐

盈角韓子悲深十二郎

謂師伯平山先生

蟲臂固難逃造

物童心曾與戒垂堂寢門一哭平生義兩世師恩

未敢忘

季思曾祖聲九先生爲先君子業師

有感

癸卯季秋作

雲車玉版五城高
控鶴還從下界遨
術受黃庭能役鬼
書成紫篆任揮毫
何人肯解湘江珮
有客偷傳閬苑桃
得道卽君塵獨隔
安思滄海釣靈鰲

楓林

楓林蕭颯夜飛霜
照眼珊瑚十丈長
不識悲秋緣底事
曹騰一醉便重陽

載酒登臨一逕斜
亂山荒草艷殘霞
霜清月冷人歸去
纔看秋光到菊花

題桐下看月圖用倪雲林述懷詩韻

秋陰澹將夕
疎桐流月多
寒光寫幽意
不復容狂

歌參差池閣間一二流螢過野煙寒有色天漢清
無波睇空聊適我耀遠思自他美人不可見良夜
將如何

霜月步韻

看月獨宜秋能添巖壑幽光懸千樹直氣逼曉霜
浮永夜停清瑟新寒戀敝裘懷人長不寐滅燭且
淹留

十宮詞步韻

破敵陰謀借芻蕘水犀軍散女戎多憐渠一顧真
傾國忘却三年自枕戈麋鹿會遊吳苑草鴟夷空

壯浙江波無情剩有靈巖月曾照君王長夜歌

右吳宮

章華臺後細腰宮萬戶荆揚土木窮入夢巫山神
女雨披襟別館大王風縱人氣折殺函外豎子兵
臨鄢郢中一白靈均哀去國夷陵祠墓劫灰空

右楚宮

蔽日連雲複道開阿房宮館屬章臺美人不與降
王死沉璧旋隨使者回渤海三山舟自遠咸陽一
炬骨俱灰望夷未抵焚坑禍假手刑餘詎足哀

右秦宮

回風一曲占恩暉又過平陽侍尙衣
妄意生前金屋貯苦思死後玉顏歸
甘泉書受神君語絕域槎通織女機
他日銅仙清淚落可堪漢月出宮扉

右漢宮

銅雀荒臺試一登奸雄熱燄散如冰
分香賣履心徒切涌石成圖勢遽乘
巫峽行雲歡入夜宓妃留枕淚沾膺
建安祠賦君家好顧命煌煌知未曾

右漢宮

五千宮伎納東吳外患平知內患無
此座應爲兒子惜輕車漫任爾羊驅
柄移貴戚三楊擅禍及青

衣二帝徂最是按庭爭寵後翠裘焚却鬪珊瑚

右晉宮

寧遠詔勅事權臣秉軸都歸阿丈珍帳底仙飛芳
樂月雉頭花奪建章春霜鐘別院殊難曉鼙鼓橫
江不動塵早識白門須一決縛菰空自怨前人

右齊宮

蒲宮學士樂忘憂不數琵琶唱莫愁夾坐有箋懸
酒令刺閨無事勅更籌師陳桃葉山前渡淚染臙
脂井上留妄說吳公臺下路瓊枝璧月尙清遊

右陳宮

新聲掩抑促哀絃西苑南都漫闕妍顧景無多宜
樂飲來生有願痛歸禪殘花尙入雞臺夢剪綵都
成板渚煙留得玉鈎芳草在至今螢亂雨餘天

右隋宮

放度摩尼未忍離承恩重訂入宮期宣華尙恚同
心綰漢祚何曾諸呂移鸚鵡夢來張兩翼桑條歌
復啓三思李唐家事多如此怪底金錢賜洗兒

右唐宮

爲成仲兄題畫

春蚓何能貌此君青藤有筆破千軍便須掃却風

中柳截取湘江一段雲 右墨竹

寒花永與結心知興發毫端倒一卮寫到色香俱
淡處烟披雨沐欲開時 右菊花

暮鐘聲裏亂歸鴉小鳥飛來竹外斜莫怪薄寒相
逼甚滿林霜月宿梅花 右梅花小鳥

筆下抽將葉葉新空堂便覺雨風頻看他舒卷非
無意也展綠天來覆人 右芭蕉

遠人無目樹無枝萬里蒼茫入望時不信邱山等
毫末畫中真有漆園詞 右山水遠景

過香心閣拜梅五娘

明妝玉貌儼垂綃小閣危欄敞碧郊縱使軍中無
白馬何曾天意有黃巢丹陽結客生能報烏鵲成
歌死自拋千古貞心香未散年年寒雪上梅梢

自題小畫

老樹倚懸崖秋濤撼危石蕭然草閣中坐對江天
碧

涇川雜咏

鄭漢林先生博學勤于著述嘗倣班史脩
邑乘因取邑中古跡凡仕宦流寓名人烈
女之行事可歌咏者編爲樂府先伯父環

石公及先君子皆有作余自惟固陋豈敢
知樂而慨慕餘徽聊咏所見惜乎有道既
逝不得就正于其前也

陽侯辭

伏羲時有陵陽國路史陵陽山名在
宣州涇縣封侯曰陽侯死于水爲水

神所云陽侯之波是也論語摘
輔象伏羲六佐陽侯主江湖

波震蕩兮逆擊日晦冥兮無色侯之威兮施赫維
侯主兮江湖贊包犧兮廟謨勤其官兮水死鞭龍
馬兮負圖陵陽兮截截涇流兮活活侯生而君兮
死而來遊駕神龜兮從赤虬颯風雨兮揚中流酌
侯兮清酤娛侯兮巫舞侯心欣兮無怒奠吾民之

居兮萬萬古

楚王怨

漢明帝永平十三年楚王英有罪廢徙涇縣賜湯沐邑五百戶十四年英

自殺詔以諸侯禮葬于涇

楚王英一何愚朝從黃老暮浮屠金龜玉鶴刻識
書稱說祥瑞聊爲娛淮南自尊誠有諸坐以謀逆
寧非誣事下庭尉請加誅詔書先殺虞司徒王不
自決能生乎王昔曾能事太子賁予往往承恩肯
託在蕃輔積不韙黃繚白紵求贖死詔還其贖歸
其使助興桑門設饌簋吁嗟乎中原從此有釋氏
楚先好之禍所始

甬里戰

漢獻帝建安三年太史慈據涇縣孫策擊擒之于甬里

江東獬兒有孫郎軍鋒所向無人當青州名士有
太史義膽欲爲知己死獬兒名士逢兩雄兩雄相
慕還相攻戰酣下馬徒手搏軍前環看眼花落神
亭鬪甬里擒捉君臂推我心請往收散卒因之窺
華歆明日日中定來見丈夫許身終不變遺書封
篋貯當歸嗚呼曹瞞徒爾爲

虞翻戍

虞翻仕吳爲騎都尉賊犯諫爭孫權不悅坐徙丹陽涇縣

虞翻古狂直難爲驕主用幸逢討逆署功曹魚服
白龍言已中仲謀不及乃兄才翻也諫口何急開

左右讒言日交煽遂令荷戟涇川來來涇川還建
業隨阿蒙奏凱捷君臣貌契心嫌猜手劍欲擊怒
不問孟德尙殺孔文舉孤于虞翻何有哉老臣永
作交州戍披髮鹿裘編易註回望涇川隔雲霧

琴高曲

琴高居涇北二十里山巖修煉道成
控鯉上昇因名共山曰琴高山溪曰

琴溪每歲上已溪中出

小魚高遺藥滓所化

若有人兮山之中手揮綠綺生清風清風吹得碧
雲起千巖萬壑皆絲桐上有煉丹洞下有鼓琴臺
得道落死籍御風窮九垓朝遊涇溪暮涿水都見
仙人跨龍子不知溪上巖竇間魂魄千秋猶戀此

君不見春風上已時
溪漲桃花亂無數
纖鱗遊都是藥渣
變古今元氣無終
窮空山月夜還應
逢若肯相攜遊汗
漫騰身騎上赤鯁
公

桓嶺屯軍行

晉桓彝爲宣城內史蘇峻反彝起兵赴難遂屯涇縣峻將韓晃

攻涇裨將俞縱戰死城陷彝死之

元規激得蘇峻叛
遠遁潯陽如鼠竄
宣城內史糾義兵
慷慨捐驅赴國難
一戰保桐汭再戰
屯涇川厲色責長
史主憂臣敢安譬
之鷹鷂逐鳥雀如
其不濟命在天桓
公不負國俞將不
負公蘭石旣敗賊
進攻一腔血濺涇
溪紅吁嗟乎睢陽
南八同日

死千古人稱好男子

遺民把釣咏

劉遺民逸其名嘗爲柴桑令後棄官釣魚于白水灘上

陶令隱田園劉令隱漁釣一時兩逸民千古仰高
蹈白雲潭上石巋然雲飛水底開青天春風花朝
秋月夕錦鱗撥刺浮青淵昔者十八賢匡廬結蓮
社宗雷陸修靜一一臂堪把應嫌靈運去復來避
人獨釣山城下得魚沽酒懷抱開眼中時事如浮
埃衣冠江左推王謝九日從公戲馬臺

石鼓山歌

山在邑東相傳馮唐嘗居此擊鼓集賓客一云陳後主擊鼓召賓客

此于

石可鐘亦可鼓鼓可瓦亦可土天地鑛自揚詡氣
有六聲成五臨平山傳自古伐蜀桐刻魴鱣擊神
鉦中律呂涇之東萬山聚中有石圓而巨山出雲
天欲雨灑飛泉若擊拊聲淵淵駭翔羽我來遊久
延佇始何人據齊語作邑乘欺聾瞽逞浮談佐揮
塵一半傳馮唐一半傳後主

安吳嬰城謠

梁天寶初宣城內史揚白華不
附侯景進據安吳景遣于子悅

等帥衆攻
之不克

跛奴北來兵禍起君有邵陵臣仲禮湘東食子無
下意舍身臺城荷荷死草間拜賊多如麻阿誰拒

守揚白華遣子入援衆軍集一戰星散成蟲沙安
吳彈丸地內史振螳臂誘斬來亮拒子悅聊爲官
軍舒憤氣賊奴帥衆親攻城惜其力屈還偷生不
見闔門登鬼錄慷慨就死張吳興

猷州刺史歌

唐書隋大業末左難當據涇縣高祖武德三年難當歸附授猷

州刺史六年輔公祏叛七年公祏遣兵圍猷州刺史左難當嬰城自守

刺史舊隸杜伏威伏威反正公從歸秦王倡議逐
隋鹿擒充斬實兵神速區區輔伯欲何爲跳梁丹
陽取誅戮寇壽陽圍猷州猷州城小如黑子全憑
衆志成金甌駐軍幕溪上築壘柏山頭指麾百戰

風雲愁張鎮周李大亮殺賊血染涇溪漲嬰城待
得大軍來刺史東南一保障

桃花潭送客行

李白遊涇縣村人汪倫嘗醞美酒待白白臨行有岸上踏

歌桃花潭水之句

有花招得謫仙遊有酒呼得謫仙把謫仙不久謫
人間放歌一到藍山下涇川三百里桃花千樹林
春風吹花照溪水片片飛入盃中深爾騎鯨來
飄然捉月去故人情似千尺潭傾倒爲君欲君住
送君行憶君處踏歌聲夕陽渡

東峯亭晏捷篇

唐永泰中御史中丞季廣琛討寇遊此亭大歷初袁修招

討命將破石埭賊聞捷
因于亭上晏客賦詩

石埭小醜何紛紛殲厥渠魁渙其羣賣刀買犢勸
歸耕後有招討前中丞千里烟塵一劍掃袁公奏
捷東峯道作詩勒石紀軍功咏物舒懷流盛藻蘇
寓賦寒溪草袁邕賦陰崖篠李岑賦棲烟鳥高慘
林翠太真苔一時戰藝風雲繞回思舊日季公亭
妖霧連山猿鳥驚宅宅佃田皆赤子潢池何苦弄
戎兵

風光謠

唐宣宗小字風光與黃藥偕隱水西
有瀑布聯句又題扇有朝廷若問江

南事報道風光
在水西之句

涇川名勝惟水西李白杜牧俱畱題何來黑虎與
碧雞共傳帝子林間棲光王枕本皇太叔韜晦不
能辨麥菽若使少小遊民間定策禁中將改卜風
光傳會始何時信以傳信疑傳疑應憶春秋經筆
削郭公夏五存其辭帝子潭黃蘗寺若耶雲門無
此致醉遊不問題扇字

香心娘歌

梅氏五娘洪勝可妻夫死黃巢亂賊逼之誓死不從有白馬將軍者

欲殺之以全其節梅引刀自刺心香數日不斷

臭莫甚于寡耻哀莫大于心死六臣謬自爲丈夫
唐亡僅見此女子惟女從夫生死與俱夫死于賊

女也捐其軀軀肉何足愛愛軀使心壞不見前賢
言餓死事小失節大幸全其節白馬來遺以佩刀
得自裁心香不散化作梅一枝開近青陵臺萬古
徒爲白馬惜胡不翻身來殺賊

六印加劍行

宋工部侍郎凌策少夢人以六印加劍上遺之後治蜀凡六任

王旦病薦十人代惟策與李及未相然亦皆爲名臣

頗怪周家設官衆筮謀龜卜還占夢非思非噩無
可占幻兆他年竟奇中我聞凌子奇弱冠讀書時
六印加劍上神人夢遺之印累累劍霍霍六度驅
車登劍閣劉盱李順漫縱橫已見夔門嚴鎖鑰是

時張公知益州能舒天子西顧憂張公凌公代還
往盡化荆棘成耬耰自從蜀道歸報命上方向公
公已病十人同薦八人相黃閣功名自前定君不
見殿中錦半臂夢裏承天賜寶參明日平章事

金庭抗節引

鮑若虛太學生以軍功補官靖
康元年奉使于金爭論疆圉不

屈被囚歸化州已而雄辨
得釋還後以武翼郎致仕

大丈夫生不爲將得爲使折衝虜庭亦快事不謂
宋家專用此緩則金繒急割地內有李尚書外有
宗將軍朝論主和不敢戰遂令二帝長蒙塵當時
畏金如畏虎鮑生視金如視鼠兩河三鎮論風生

慷慨南冠作囚虜小臣雄辨猶生還雪窖牛車不可攀歸去郎官終武翼何如洪皓英州謫

森翠樓吟

淳祐間程炎子隱琴高臺文丞相守宣州引車過炎子名其樓曰森

翠

涉江兮遵渚攀木蘭兮擷芳杜眷靈脩兮求女君何爲兮獨處紛五馬兮來遊環竹樹兮循溪流心慕子兮聊淹留緬鱗鬣兮爲題樓題樓兮森翠仁同兮道異我出而子處兮士各有志倏霜露兮飄零歎蕭艾兮叢生羌絕海兮零丁樓中人兮宛在雲沈而山寂兮其終不悔

建康副使調

元臺史洪文廣刻平章桑哥擅權怙寵謫建康廉訪副使又三

上書言朝廷得失桑哥矯詔命賁首京師鄉人私謚曰忠節

高陽牧忽擢臺史感激報恩寧惜死首刻省臣黜
建康琅玕披腹排天聞一歲未終三上疏直言時
政省臣怒頭顱萬里行燕京天子何曾知死生君
不見程行臺趙承旨痛憤省臣日怙侈行臺入奏
幾危身承旨不言懇徹里省臣之權劍倒持嗚呼
副史如不知諡以忠節鄉人思

蘇公碑

學宮有蘇公政績碑趙孟頫書兵燹後碑淪泮池每夜有光見者異之遂

起搜

蘇公我涇之良宰絮我于寒餉我餒此碑無異召
公棠陵谷雖移碑不改況有松雪爲書丹筆法依
稀徐與顏何年淪落泮池裏每夜風雷光怪起吳
興書循吏績人間雙美寧沉抑不見珠玉山川中
精氣上騰如白虹拽碑出水劇摩抄字跡完好無
舛訛後來誰是魯山牧我我大碑盍一讀

輟講彈

明董傑進士觀政時上疏論經筵暑
月輟講事與冢宰王恕異同鄒智湯

鼎被誣忌者陷以朋黨并刻傑陷
之幾不測仍賴王公申救獲免

宋儒程子嘗有言君德成就歸經筵邇英漸熱就
崇正談經豈必規時令若使君心嫌暑月不暑不

寒還作輟相公當以德愛君莫謂小臣言激烈小
臣釋褐初成名不惜批鱗進諫爭相公不怒羣小
驚從此朝廷立朋黨鄒李湯劉盡一網要使諸公
死廷杖小臣能言敢愛身嗚呼攀檻碎衣爾何人

水西講學操

嘉靖間建陽明祠講良知之學
錢德洪王畿更迭往來學士雲

集天啟初邑人追祀朱
子政稱朱王二先生祠

東峯之阿講堂栽栽千里命駕鱗集雲羅涇人於
學自其天性樹節植名卓吾先正孰宗姚江始自
錢王涇人改祀冠以紫陽紫陽盡人姚江任天任
天者肆盡人者全聖人之學名臣之業各行其是

孰強其合嗚呼二公百世聞風胡堂宇是崇而蔓
草之中

台泉雲龍歌

嘉靖間許文穆公國讀書台泉
山一時從者俱登巍科爲列卿

其講誦處名

雲龍書屋

石山累石高崔嵬下有泉眼通三台鍾日毓月靈
氣集天公留與非常才文穆遠自新安來講堂高
壓雲門開一時絃誦聚羣彥德星入夜光昭回男
兒富貴何足異要在英英蘭生氣不見羣賢去國
時玉杯犀舁鐫奇字許公相業魏丙倫從遊諸子
俱名臣先生爲龍弟作雲相隨上下雨紛紛至今

山頂畱遺跡時有閒雲出巖隙

嚼齒歎

朱儀任嘉定州知州張獻忠陷蜀圍州城城破不屈闔門遇害

從古凶盜那有此入川誓殺闔川死尸連劍閣棧
中雲血作嘉陵江中水朱公報最將欲行忽逢蜂
蟻屯縱橫公曰我去誰保障嬰城誓與城死生公
死忠子死孝闔門男女俱鬼錄丹心日月同光照
吁嗟乎生不能殺賊死當爲國殤嚼齒憤比張睢
陽銜冤上新叩帝閭帝遣天邊下肅王

宗秀才

宗泐高僧也住水西黃葉寺明太祖徵至京師嘗與宋濂同侍太祖呼宋

曰和尚宗
曰秀才

禪門誰是讀書子宗泐名齊宋學士昂然老鶴出

霜晨形不可卽聲可聞

朱竹垞先生贊泐詩如此

天台飛錫西

水寺天子徵爲右善世執筆嘗同宋公侍秀才和
尚名易置半生難割惟詩魔萬念灰冷如焦禾固
請還山踏芒屨天子題詩送歸去歸來雲月無盡
時散步逍遙從所之直恐和尚做難了同時燕邸
姚斯道

題畫蝶

誰道仙翁骨已灰衣衫化作蝶飛回有人夢入南

華去下筆偷從帝所來

陸魯望橘蠹文云或疑其自鈎天帝居來矣

三

月好花紅雨亂六朝芳草碧烟堆憐他膩粉輕盈
態費盡當年謝逸才

青巖詩鈔卷四終